

太乙真人



太乙救苦護身妙經

爾時元始天尊。在玄景之上。清微天中。九色
玉堂。升七寶座。放大光明。普集萬靈。與
天教化。十方天尊。道君老君。帝君元君。
丈人聖人。萬萬仙眾。俱來詣座。聽宣妙法。
於是梵王稱善。

帝釋欣歌。仙樂自響。隨光而至。

是時太上老君。身離玉座。步躡蓮花。真人侍

於左右。玉女扶於曳裾。至天尊前。奏曰。臣等蒙師開化。受福天堂。施功無極。恩不可量。臣觀三界之中。苦海之內。無量眾生。橫遭厄難。罪網牽纏。異類羣情。難逃生化。臣不可住於太清。欲仗威光。分身三界。救度羣情。唯望至尊。觀心慈湣。於是元始天尊。微起法身。告老君曰。善哉。汝離玉座。驚怖萬天。救苦救生。不須汝言。

可還座中。吾為宣說。

天尊曰。萬物吾生。萬靈吾化。遭苦遭厄。當須救之。不須汝威力。化身救度。此東方長樂世界。有大慈仁者。太乙救苦天尊。化身如恒沙數。物隨聲應。或住天宮。或降人間。或居地獄。或攝群邪。或為仙童玉女。或為帝君聖人。或為天尊真人。或為金剛神王。或為魔王力士。或為天師道士。或為皇人老

君。或為天醫功曹。或為男子女子。或為文武官宰。或為都大元帥。或為教師禪師。或為風師雨師。神通無量。功行無窮。尋聲救苦。應物隨機。今告汝知。老君重奏曰。此之威神。有無量變化。如何得至我師禦前。天尊告老君曰。汝可舉聲。唱太乙之名。使仙官齊詠。自然應化現身。於是老君眾仙等。尊其教旨。齊聲稱詠太乙救苦天尊之名。忽

見。帝君班中。有童子一人。步步躡於蓮花。稽首至天尊前。奏曰。臣乃太乙。為我師開化說法。臣集相聚形。聽宣妙音。天中快樂一時。地下動經萬劫。三界之中。群生受苦。高聲呼喚。苦哉苦哉。旋繞天尊禮拜。俯伏乞下天關。於是眾仙見童子奏對。

泣淚滴衣。哽噎歎言。

天上快樂。地下受災。

輪回報對。何時清閒。

天尊告太乙曰：

汝行願慈悲。眾生受苦。

依汝行願。分身救之。

童子喜笑。再拜而退。

眾仙觀見童子化一天尊。足躡蓮花。圓光照耀。手執柳枝淨水。九頭獅子左右從隨。乘空而去。又見天尊化一帝君。躡蓮花。手執如

意。圓光照耀。九頭獅子左右從隨。乘空而去。又見帝君化一真人。足躡蓮花。手放神光。上通九天。下通九地。九頭獅子左右從隨。乘空而去。又見真人化一女子。身著火錦襯衣。披發跣足。躡於蓮花。手執金劍。圓光照耀。九頭獅子口吐火焰。繞於身形。乘空而去。老君奏天尊曰。此聖威德。變化救生。從何而有。甚劫修行。惟願應機。為

眾宣說。

天尊曰：此聖在天，呼為太乙福神。在世呼為大慈行者。在地獄呼為日耀帝君。在外道攝邪呼為獅子明王。在水府呼為洞淵帝君。汝是吾之氣。吾是汝之根。汝知吾知此。是九陽之精。甚靈甚靈。汝可秘之。不可盡述。是時老君聞

天尊言。閉目定神。彈指叩頭。咒曰。

元元之祖氣。妙化九陽精。
威德布十方。恍恍現其真。
三九揚風出。徘徊離始青。
恭敬生瓊液。奉之免渴饑。
萬靈當信禮。八苦不能隨。
積行持科戒。提攜證玉京。
爾時。天尊重告老君及諸仙曰。
若有眾生。時遭疾疫。病痛纏綿。可以焚香。

念誦聖號。看轉此經。疾患退散。克獲安寧。
若有眾生。求官覓職。奸佞妄生。但當念誦
聖號。看轉此經。自然嫉妒不生。高遷祿
秩。若有眾生。泛涉江海。波浪所驚。魚龍
欲傷。可以存思。念誦聖號。使得達岸。無
有害傷。若有眾生。值雷霹靂。風雨驚怖。
但當存思。念誦聖號。神氣亦清。魂魄不動。
若有眾生。父母師資。六親不和。兄弟乖逆。

但當存思。念誦聖號。看轉此經。自感六親
和睦。父慈子孝。兄友弟恭。若有帝王國主。
朝生叛臣。兵火作亂。風雨不調。萬民塗炭。
怨地尤天。但當持齋念誦。看轉此經。風雨
便得順時。叛臣敗露。國泰民安。若有眾生。
為邪精鬼賊妄來所傷。但存思念誦聖號。妖
魅自止。鬼賊滅亡。若有眾生。山林往來。
被蟲蛇禽獸奔奪所傷。但當存思念誦聖號。

禽蟲自退。不敢來害。若有女人。懷受胎孕。臨產艱難。但當存思念誦聖號。自感真氣佑護。無痛無傷。便生智慧之男。有相之女。六根具足。母子團圓。若有男子女子慕道求仙。在家出家。養性養命。但當存思念誦聖號。看轉此經。便得功行圓滿。白日升天。若有眾生。頻遭百鎖牢獄之中。呻吟難訴。但當存思念誦聖號。便得解脫。出離囹圄。

若有眾生為七祖九先門人同學。夫妻男女。身歿之後。流滯寒庭。未得托生。但當存思念誦聖號。自然出離陰境。便得生天。若有眾生為冤家牽引。複連相纏。但當存思念誦聖號。冤家解釋。後連斷除。於是。

天尊告老君曰。此聖最尊最貴。最聖最靈。每月三九日。多降人間。常於淨室中。焚香禮

拜。柳枝淨水。時花藥苗。如法供養。自然
壽滿一百二十。五福常臻。八難遠離。切忌
灶下灰燼。石榴穢物。此為不潔。勿令觸之。
天尊說經畢竟。大會之中。羣仙唱善。獅子
能語。鳳凰能言。魚龍成人。枯朽還生。蠢
動含情。福資皆遍。巍巍堂堂。皆得升仙。
於是道君老君。無量眾真。同聲讚歎。今聞
妙音。大獲利益。奉辭而退。

救苦寶誥，太乙救苦寶誥，

青華長樂界，東極妙嚴宮，
七寶芳騫林，九色蓮花座，
萬真環拱內，百億瑞光中，
玉清靈寶尊，應化玄元始，
浩劫垂慈濟，大千甘露門。

妙道真身，紫金瑞相，
隨機赴感，誓願無邊，

大聖大慈，大悲大願，
十方化號，普度眾生，
億億劫中，度人無量，

尋聲赴感太乙救苦天尊青玄九陽上帝。（三叩首）

太乙救苦護身妙經 卷終

太乙救苦天尊，是道教信奉的諸神之一。太乙，又作太一。道經說：太乙天尊居天界妙嚴宮，是專門拯救墮入地獄之人的大神，若人回心向善，只要誠心祈禱，並默誦『尋聲赴感太乙救苦天尊』聖號，即能得到解脫和救助。道教在舉行『超度』道場時，均要懸掛救苦天尊神像，以示接引，救濟苦難。